

摘藻堂四庫全書薈要

經部

欽定四庫全書會要

經部
禮記集說卷三十

詳校官編修臣程嘉謨



欽定四庫全書薈要卷二千一百五十八

經部

禮記集說卷三十

宋 衛湜 撰

冢宰制國用必於歲之杪五穀皆入然後制國用用地
視年之豐耗以三十年之通制國用量入以為出
祭用數之仂

鄭氏曰制國用如今度支經用杪末也小大豐耗謂
小國大國豐凶之年各以歲之收入制其用多少多
不過禮少有所殺也通三十年之率當有九年之蓄

出謂所當給為祭則筭今年一歲經用之數用其什

一

孔氏曰自此至以樂一節論冢宰制國用及年之豐耗并喪祭及所蓄積之法用地謂制國之用凡制國用必計地小大又視年之豐耗若地大年豐則制用多地小年耗則制用少先以三十年通融之法留九年蓄外計見在之物以制國用每年所入分為四分一分擬為儲積三分為當年所用二年又留一分三

年又留一分是三年總得三分為一年之蓄通三十年之率當有十年之蓄也鄭註出謂給為者給謂給百官賓客及民人也為謂為造國家器物也知祭用今年一歲經用之數用其什一者以下文云喪用三年之仿此直云數之仿故知是一歲之仿也又知仿為什一者以仿是分散之名考工記云以其圍之仿捐其數彼註仿謂三分之一此云什一者以民稅一歲之十一則國祭所用亦十一也此謂當年經用之

內用其什一非是通計擬三年儲積之蓄也故鄭云
一歲經用之數也

崔氏曰通三十年當有十年之蓄下云有九年之蓄
者三十年之間大略有閏月十二足為一年故唯有
九年之蓄也

長樂劉氏曰三代以前天下無兵也莫非卒伍其民
以為軍師以守邦土是以欲固其國者先保其民什
一之法行則其民有以自養也水溢凶旱頻年荐至

民闕其食則國有九年之蓄所以保民而固國也用
地小大者欲知萬民多寡之實也視年之豐耗者以
裁國家費用之宜也通以三十年所入之數則豐耗
在其中矣即其通數以為禮制則三十年之內雖有
凶荒而國用亦不匱矣又有九年之蓄在外所以防
大凶災保育其民者也

嚴陵方氏曰周官大宰以九式均節財用則制國用
存乎冢宰明矣制國用制其多少之數也然國之用

資於財財之成繫乎歲歲之功見乎末故制國用多
少之數必於歲功之杪也以歲之功見乎末猶木實
成乎杪五穀即黍稷菽麥稻也先後固不齊矣故必
五穀皆入然後可以制國用也歲之杪則五穀皆入
矣申言之者以見百貨之用制之者以五穀為主
也用地小大視年之豐耗者地小而所出之物多則
由乎年之豐地大而所出之物少則由乎年之耗故
用地小大以視年之豐耗也必視年之豐耗將以制

國用故也耗減也上曰歲下曰年者歲之抄主時言
之年之豐耗主物言之故也且言歲則必期焉言年
則不必期也亦見曲禮歲凶年穀不登解以三十年
之通制國用者通融三十年之豐耗以為國用多少
之制也必以三十年為期者舉一世言之而天時人
事大略可知矣上言制國用於歲之抄此以三十年
之通者蓋為比年之常法則以三十年之通權一歲
之宜則於歲之抄而已量入以為出者量三十年所

入之多少為比年國用之節也

馬氏曰冢宰者以位言之則處於六卿之上故謂之冢冢者以言其高之極也以職言之則主天下之事故謂之宰宰者以言其主也蓋歲之杪者萬物以成方此之時而九賦皆入焉故周官以九式均節財用必在於九賦之後也國之用則在於財而財之所出則在於地地之所生則本於天時地之所出有多寡而天時之所成亦有多寡故曰用地小大視年之豐

耗蓋禮之大倫以地廣狹而以為常也禮之厚薄以年之上下而以為變也周官以九式均節財用而喪祭居其二焉故王制止言喪祭者舉其重者而言之也喪則用三年之飭祭則用數之飭何也蓋祭則有常典而喪者出於非常之變也出於非常之變故喪三年則不祭非特哀有所隆而祭有所不暇也抑亦見財費之不可無節國之用非止於喪祭而以喪祭為重

山陰陸氏曰詞間容之有不必也冢宰制歲之用以其餘歸於此謂之仂仂若卦之仂

四明沈氏曰古之理財者論天而不論人圖遠而不圖近今之理財者立為一定之法而不計天時之如何以無常之天時而應有常之供賦民何得不窮哉圖於目前不暇給之計而不計後日水旱之如何以不可測之水旱而處以苟簡倉卒之調度國何得不困哉此冢宰所以待歲之杪而始制國用而不敢立

為一定之法以三十年之通制國用而不敢止為目前之計也

講義曰用地大小校之則所入之多寡可見故可以觀年之豐耗也

金華邵氏曰先王之制國用不為定法非若後世之拘於繁文守常而不知變者故為法也必於歲之杪蓋歲杪則五穀皆入可以視其所入而為所出也又用地小大視年之豐耗以三十年通融之法留九年

之蓄然後計見在之數以為用度之法豐不使之有
餘耗不使之不足曷嘗有定法哉如此故天不能使
之災地不能使之窮而凶荒水旱其民不至於流離
飢餓者此也祭用經用之什一者不敢略於神也喪
用三年之仂抑亦送死之禮尤所不當略乎

喪三年不祭唯祭天地社稷為越紼而行事喪用三年
之仂喪祭用不足曰暴有餘曰浩祭豐年不奢凶年不
儉國無九年之蓄曰不足無六年之蓄曰急無三年之

蓄曰國非其國也三年耕必有一年之食九年耕必有三年之食以三十年之通雖有凶旱水溢民無菜色然後天子食日舉以樂

鄭氏曰越紼行事不敢以卑廢尊越猶躡也紼輶車索也喪大事故用三歲之什一暴猶耗也浩猶饒也不奢不儉常用數之仞也菜色食菜之色民無食菜之飢色天子乃日舉以樂侑食

孔氏曰私喪者是其卑天地社稷是其尊今雖遭私

喪既殯以後若有天地社稷之祭即行之故鄭云不敢以卑廢尊也越是踐躡之義未葬之前屬紼於輶以備火災今既祭天地社稷須越躡此紼而往祭所故云越紼六宗山川之神則否其宮中五祀在喪內則亦祭之故曾子問曰君薨五祀之祭不行既殯而祭之自啟至於反哭五祀之祭不行既葬而祭之但祭時不須越紼蓋五祀宮中之神喪時朝夕出入所祭不為越紼也杜預註春秋以為既祔以後宗廟得

四時常祭三年大禘則同於吉與三年不祭違者禮記後儒所作不與春秋同也物被殘暴則虛耗故鄭云暴猶耗也浩者是多大之義故云猶饒也凶旱謂凶荒遭旱也水溢謂水泛溢若貯積滿九年之後則腐壞當隨時給用也

河南程氏曰越紼則是猶在殯宮於時無由可致齋又安能脫喪服衣祭服此皆難行縱天地之祀不可廢則止可使冢宰攝爾昔者當英宗初即位有人以

此問正叔正叔謂古人居喪百事皆如禮雖廢祭祀可也今人百事皆如常特於祭祀廢之則不若無廢為愈也子厚正之曰父在子為母喪則不敢見其父不敢以禮見也今天子為父之喪以此見上帝是亦非禮見上帝也故不如無祭

橫渠張氏曰唯天地社稷越縉而行事則是未葬未葬則如何祭是時雖欲祭之不可得也若居喪未祭則因禮有總不祭之文方祭之初雖功總如何可祭

又豈可三年廢祖先之祭久而哀殺可齊則便可祭
以人情酌之三年之喪期可祭期之喪既葬可祭總
功之喪踰月可祭當服祭服祭之各以其盛服祭罷
反喪服

藍田呂氏曰人事之重莫甚於哀死故有喪者之毀
如不欲生大功之喪業猶可廢喪不貳事如此則祭
雖至重亦有所不可行蓋祭而誠至則忘哀祭而誠
不至不如不祭之為愈也後世哀死不如古人之隆

故多疑於此

新安朱氏曰古人居喪衰麻之衣不釋於身哭泣之聲不絕於口其出入起居言語飲食皆與平日絕異故宗廟之祭雖廢而幽明之間兩無憾焉今人居喪與古人異卒哭之後遂墨其衰凡出入居處言語飲食與平日之所為皆不廢也而獨廢此一事恐亦有所未安竊謂欲處此義者但當自省所以居喪之禮果能始卒一一合於古禮即廢祭無可疑若他事不

免墨衰出入或其他有所未合者尚多即卒哭之前
不得已準禮且廢卒哭之後遇四時祭日以衰服特
祀於几筵用墨衰常祀於家廟可也但卒哭之期須
既葬立主三虞之後卜日而祭以成事方可耳若神
柩在而欲以百日為斷墨衰出入則決不可 又曰
家間項年居喪於四時正祭三獻受胙非居喪所可
行而俗節則唯普同一獻不讀祝不受胙也其禮甚
簡以墨衰行事

山陰陸氏曰不祭謂宗廟爾即天地社稷雖未葬猶祭是之謂越絺者五祀蓋亦不廢不足則取之或暴用之不竭浩也國非其國言如此國非人之國矣

長樂劉氏曰以三年之飭共於喪祭斯亦足矣踰禮越中殘暴其物俾有不足者故曰暴也儉於禮而不盡其財故曰浩浩謂財有餘而禮不足也

嚴陵方氏曰易言大衍之數也揲之以四以象四時歸奇於扚以象閏蓋扚者指間也揲著而四分之奇

則歸之於指間故也此所謂佻亦四分之一爾數之
佻則一年所用四分之一也三年之佻則三年所用
四分之一也祭之用數而寡故用一年之佻喪之用
䟽而多故用三年之佻亦各稱其宜而已喪三年不
祭則不以吉事干凶禮也唯祭天地社稷則不以所
親廢所尊也

馬氏曰禮之厚薄與年之上下豐年則用豐年之佻
凶年則用凶年之佻豐年而加於佻之外則謂之奢

凶年而略於飭之內則謂之儉乃所以與年之上下也預備不虞者古之善政也急者迫而不緩也無九年六年之蓄雖非完國猶足以為國也至於無三年之蓄非其國也蓋國之所以為國者以有民也民之所以為民者以有財也苟無其財則民散而之四方矣故曰無三年之蓄非其國也三年耕必有一年之食推而至於二十七年耕必有九年之食以三十年言之者舉成數也說者以為三十年為一世三年耕

必有一年之食至三十年之通此人力也雖有凶旱水溢此天變也人力備則可以應天變蓋王者與民同患故雖有凶旱水溢而民無菜色於下然後天子食日舉羞備禮而以樂侑之也

李氏曰魯莊公冬大無麥禾臧孫告糴于齊傳曰古者稅十一豐年補敗不外求而上下皆足也雖累凶年民弗病也一年不艾而百姓飢君子非之明王制民之產業上地食九人而準之以七人故三年耕而

有一年之食九年耕而有三年之食夫欲九年之蓄
而以三十年之耕常以其有餘計之此補不足之道
也子曰如有用我者三年有成又曰如有王者必世
而後仁亦謂是與故孟子曰聖人治天下使有菽粟
如水火而民焉有不仁者乎先王之治田蕩之以溝
均之以遂足以禦凶旱舍之以列寫之以澮足以禦
水溢而猶恃九年之蓄者待天災之盡也先王備水
旱者具矣而猶有水旱之患蓋天時不可知雖先王

之備法有所不免也民有菜色可謂民可以食鮮可
以飽之時也詩曰我取其陳食我農人美蓄積之多
也

延平周氏曰不足言其財急言其民國非其國言其
上

長樂陳氏曰古者天子大喪大荒大札則不舉天地
有裁邦有大故則不舉至於荒政則蕃樂大凶則弛
縣然則以三十年之通雖有凶旱水溢民無菜色然

後天子食日舉以樂豈不宜哉蓋天子能承順天地
和理神人使無災害變故然後可以饗備味聽備樂
故饋食用六穀膳用六牲飲用六清珍用八物羞百
有二十品醬百有二十器齊醢六十物鼎十有二物
其舉備味如此侑以備樂可知豈非王者憂以天下
樂以天下之意乎膳夫王乃食卒食以樂徹于造大
司樂王大食皆令奏鍾鼓夫以天子一飲食之際未
嘗不闕天下憂樂與夫獨樂而不與民同者豈不有

間歟 樂書

金華應氏曰此言非謂旱乾水溢亦不廢樂也謂既有三十年通制之規模雖凶災而民不病則常時可以日舉樂耳蓋雖一飯之項而不忘乎民也若夫偶值凶年則雖有備而亦豈敢用樂乎

天子七日而殯七月而葬諸侯五日而殯五月而葬大夫士庶人三日而殯三月而葬三年之喪自天子達

鄭氏曰尊者舒卑者速春秋傳曰天子七月而葬同

軌畢至諸侯五月同盟至大夫三月同位至士踰月
外姻至三年之喪下通庶人於父母同天子諸侯降
期

孔氏曰自此至不祭一節明天子以下殯葬日月不
同及衣衾牲器之數天子諸侯位既尊重送終禮物
其數既多身在於喪許其申遂故日月緩也大夫及
士禮數既卑送終之物其數簡少又職唯促遽義許
奪情故日月促也必至三日者冀其更生三日不生

亦不生矣鄭引春秋傳隱元年左傳文杜預云言同軌以別四夷謂中國諸侯車同軌轍盡皆來至同盟者同在方岳之盟同位者行役不踰時諸侯以下不言畢至者有來有否不必盡來也左傳云大夫三月士踰月而此總云三月者除死月為三月士三月者數死月為三月正是踰越一月故言踰月耳其殯日之義已具上曲禮疏

長樂劉氏曰殯與葬生者送死之事也天子功德施

於四海諸侯功德洽於一國大夫士恩德孚於一家
庶人恩德著于其族固有小大之差矣及其終也臣
子之心未忍死之猶冀其復生也故其殯者不得已
而殯之是以有七日五日之差雖庶人之殯猶俟三
日是豈得已哉若夫葬者當其朝歲諸侯雖在六服
罔有弗至或奔喪也或會葬也或會於練祥也亦如
四時之朝焉其不當朝歲之諸侯則為位服於其國
而遣卿以會葬同軌之內畢至者謂此也七月而葬

所以極四海之哀誠也諸侯之葬必五月者相為賓也同盟之諸侯也雖非同盟而為其舅甥姑姊妹之邦也大夫士庶人三月而葬其事具其誠盡矣

山陰陸氏曰雖同是三日三月大夫數來日士庶人數往日也

庶人縣封葬不為雨止不封不樹喪不貳事自天子達於庶人喪從死者祭從生者支子不祭

鄭氏曰縣封當為縣窆至卑不得引紼下棺雖雨猶

葬以其禮儀少封謂聚土為墳不封不樹卑無飾也
周禮曰以爵等為丘封之度與其樹數則士以上乃
皆封樹貳之言二也庶人終喪無二事不使從政也
喪大記曰大夫士既葬公政入於家既卒哭弁經帶
金革之事無辟也從死者謂衣衾棺槨從生者謂奠
祭之牲器

孔氏曰鄭知封當為窆者若封是封土無縣繫之理
窆謂下棺士雖無碑猶有二綽庶人賤唯縣繩下棺

故云縣窆威儀既少日又促遽將葬之時不為雨止
公羊說雨不克葬謂天子諸侯也卿大夫臣賤不能
以雨止許慎云死葬之以禮以雨而葬是不行禮又
釋癘疾云雖庶人葬為雨止此等說則在廟未發之
時庶人及卿大夫亦得為雨止若其已發在路及葬
則不為雨止其人君在廟及在路及葬皆為雨止不
積土為封不標墓以樹卑不須顯異也鄭引周禮是
家人文既云爵等明有爵者乃有丘封周以士為爵

也彼註云王公曰丘諸臣曰封又引漢律列侯墳高四丈闕內侯以下至庶人各有差又檀弓云孔子合葬於防崇四尺鄭云蓋周之士制其樹數則無文白虎通云天子松諸侯柏大夫栗士槐鄭註貳之言二上貳是副二之貳下二是二三之二喪不貳事謂不為兩事故讀從二三之二也庶人既無爵命三年之內許其終喪除居喪之外不供他事故下云父母之喪三年不從政也盧植解云從生者謂除服之後吉

祭之時以子孫官祿祭其父祖故云從生者若喪中之祭虞祔練祥仍從死者之爵故小記云士祔於大夫則易牲又云其妻為大夫而卒而後其夫不為大夫而祔於其妻則不易牲又雜記云上大夫之虞也少牢卒哭成事祔皆大牢下大夫之虞也牲牲卒哭成事祔皆少牢是喪中之祭仍從死者之禮也而鄭云奠祭之牲器云奠則是喪中之祭得從生者之爵與小記雜記違者小記雜記據死者子孫身無官爵

生者又無可祭享故喪中之祭皆用死者之禮若其生者有爵則祭從生者之法喪祭尚爾喪後吉祭可知奠謂葬前祭謂葬後也喪終吉祭也鄭必知祭兼喪祭與廬植別者以此云祭從生者喪從死者相對又中庸云父為大夫子為士葬以大夫祭以士又云父為士子為大夫葬以士祭以大夫祭與葬相對皆祭與喪葬連文是一時之言故祭中兼為喪奠也或云在喪中祭尚從死者爵至吉祭乃用生者祿耳鄭

云奠者自吉祭之奠耳

嚴陵方氏曰封之名雖一然有所謂掩坎之封有所謂積土之封若檀弓言縣棺而封即掩坎之封也若禮器言丘封之大即積土之封也此言不封亦不積土而已

山陰陸氏曰案禮衮多借卷字有卷龍飾故也徧多借辨字徧而後能辨故也釋多借舍字寔多借封字釋之則舍寔之則封故也然則凡字雖借盖亦有義

焉言達於庶人不言自天子達異於三年之喪也三年之喪不言庶人不嫌

長樂陳氏曰縣棺而下之封土而瘞之不為雨止以其有進無退也喪不貳事以其不可奪親也魯葬定公與敬嬴以雨不克葬而春秋譏之則不為雨止者不特庶人而已天子崩王世子聽於冢宰三年則喪不貳事亦不特庶人而已必以庶人為言以其葬具之不備易以雨止食用之不足易以事奪故也祭雖

從生者而有所謂從死者故父為士子為天子諸侯
而其尸服則以士服支子雖不祭而有所謂祭故宗
子為士庶子為大夫則以上牲祭於宗子之家

臨川王氏曰喪不貳事當連自天子至於庶人為旬
三年不從政所謂不貳事使一於喪事也金革無辟
上使之非也或權制也孟子前以士後以大夫謂棺
槨衣衾之不同與此喪從死者祭從生者似異

天子七廟三昭三穆與大祖之廟而七諸侯五廟二昭

二穆與大祖之廟而五大夫三廟一昭一穆與大祖之廟而三士一廟庶人祭於寢

鄭氏曰此周制七者大祖及文王武王之祧與親廟四大祖后稷也殷則六廟契及湯與二昭二穆夏則五廟無大祖禹與二昭二穆而已諸侯大祖謂始封之君王者之後不為始封之君廟大夫大祖謂別子始爵者大傳曰別子為祖是也雖非別子始爵者亦然士一廟謂諸侯之中士下士名曰官師者上士二

廟庶人祭於寢適寢也

孔氏曰此一節明天子以下立廟多少不同之事鄭
註知七廟唯周者據禮緯稽命徵及鈎命決為說也
禮器云周旅酬六尸一人發爵則周七尸七廟明矣
諸侯始封之君謂王之子弟封為諸侯為後世之大
祖當此君之身不得立出王之廟則全無廟也故諸
侯不敢祖天子若有大功德王特命立之則可若魯
有文王之廟鄭祖厲王是也此始封君之子得立一

廟六世之孫始五廟備也若異姓始封如大公之屬
初封則得立五廟從諸侯禮也鄭註王者之後不為
始封之君廟者以其始封之君非有功德唯因先代
之後以封之不得為後世之大祖得立此君所出王
者之廟若二王之後郊天之時則得以遠代之祖配
天而祭故禮運云祀之郊也禹也宋之郊也契也大
夫之大祖則諸侯之子始為卿大夫謂之別子者也
是嫡夫人之次子或衆妾之子別異於正君繼父言

之故云別子鄭引大傳證此大祖是別子也鄭註雖
非別子始爵者亦然者此事凡有數條一是別子初
雖身為大夫中間廢退至遠世子孫始得爵命則以
為大祖別子不得為大祖也二是別子及子孫不得
爵命者後世始得爵命自得為大祖三是全非諸侯
子孫異姓為大夫者及他國之臣初來任為大夫者
亦得為大祖此三事皆始爵者又鄭荅趙商云王制
所論皆殷制故云雖非別子亦得立大祖之廟若其

周制別子始爵其後得立別子為大祖若非別子之
後雖為大夫但立父祖曾祖三廟而已隨時而遷不
得立始爵者為大祖鄭必知周制別子之後得立別
子為大祖者以大傳云別子為祖繫之以姓而弗別
綴之以食而弗殊故知別子百世不遷為大祖也周
既如此明殷不繫姓不綴食大傳又曰其庶姓別於
上而戚單於下五世而昏姻可以通明五世之後不
復繼以別子但始爵者則得為大祖也此大夫三廟

者天子諸侯之大夫皆同知者以此及祭法歷陳天子諸侯即云大夫更不別云諸侯之大夫故知與天子大夫同卿即大夫總號也案祭法適士二廟今此云士一廟故知是諸侯之中士下士祭法云官師一廟故鄭云名曰官師者鄭既云諸侯之中士下士一廟則天子之中士下士皆二廟也鄭又知諸侯中士下士同一廟者以祭法云適士二廟言適士則不得兼中下也庶人之祭謂薦物以其無廟故唯薦而已

薦獻不可褻處故知適寢也

河南程氏曰自天子至於庶人五服未嘗有異皆至高祖服既如是祭祀亦當如是其䟽數之節未有可考但其理必如此七廟五廟亦止是祭及高祖大夫士雖或三廟二廟一廟或祭寢廟雖異亦不害祭及高祖若止祭禰則猶知母而不知父禽獸道也尊禰而不及祖非人道也

橫渠張氏曰七廟之祖聚於大祖者此盖有深意以

其當有祧者且祧者當易檐故盡出之因是而祧用意宛轉諸侯則以有國指始封之君為大祖若大夫安得大祖廟數以親數又況主祭自有宗子此言蓋為世祿之家發之也

嚴陵方氏曰天子廟七即祭法所言考廟王考皇考顯考祖考廟及二祧是也諸侯五則以無二祧故也大夫三則以顯考祖考又無廟故也士一廟則以王考又無廟故也庶人則祭於寢祭法言庶人無廟正

謂此也然祭法又言適士二廟而此不言者主於降殺以兩而略之也天子之廟止於七何也大祖之廟創業之所始萬世所不遷也而昭穆則合而為六者蓋四世其服已窮矣然猶總也五世同姓已殺矣然猶免也至於六世然後親屬絕故止於三昭三穆與大祖之廟而七也

馬氏曰自上而下降殺以兩禮也故天子七廟至士三廟合於降殺以兩之意也祖以功建故無可毀之

禮而有百世不遷者也昭穆以親崇故有可毀之禮
親盡則有祧說者以為周則七廟夏則五廟殷則六
廟蓋非是也

石林葉氏曰天子七廟見於祭法者明甚鄭氏獨以
為周制而為夏五廟殷六廟之說全無所據蓋三昭
三穆與大祖之廟而七此總數也自考差而上之曰
考廟曰王考廟曰皇考廟曰顯考廟即高祖止矣高
祖而上不可考曰祖考廟者大祖廟也故謂之祧稱

二祧焉合而言之為七廟分而言之則廟有五而祧有二皆在三昭三穆之數餘見祭法

長樂陳氏曰積厚者流澤廣積薄者流澤狹故天子七廟諸侯五廟大夫三廟士一廟廟而祭之仁之至也以七以五以三以一義之盡也舜之時禋於六宗與藝祖而七商書亦曰七世之廟可以觀德則七廟之制其來尚矣先王之於死者常待之以生由士而上生而異宮死則為之立廟庶人則生非異宮死則

祭於寢而已 又禮書曰廟所以象生之有朝也寢所以象生之有寢也建之觀門之內不敢遠其親也位之觀門之左不忍死其親也家語曰天子七廟諸侯五廟自虞至周之所不變也是故虞書禋於六宗以見大祖周官守祧八人以兼姜嫄之宮則虞周七廟可知矣伊尹言七世之廟殷禮也禮記荀卿穀梁皆言天子七廟不特周制也則自虞至周七廟又可知矣然存親立廟親親之至恩祖功宗德尊尊之大

義古之人思其人而愛其樹尊其人則敬其位況廟乎法施於民則祀之以勞定國則祀之況祖宗乎於是禮以義起而殷之三宗周之文武漢之孝文孝武唐之神堯文皇其廟皆在三昭三穆之外歷世不毀此所謂不遷之廟非謂祧也鄭康成之徒以喪服小記言王者立四廟則謂周制七廟文武之二祧親廟四而已則文武不遷之廟在七廟內是臆說也孔氏疏諸侯五廟謂若異姓始封如大公之屬得立五廟

從諸侯禮然王者始受命所立不過四廟諸侯初封
蓋亦廟止高祖而已謂得五廟無是理也又鄭荅趙
商謂五廟為殷制故雖非諸侯之別子亦得立大祖
之廟周制別子為大祖若非諸侯之後雖為大夫但
立父祖曾祖三廟隨時而遷不得立始爵者為大祖
也然左氏曰大夫有二宗荀卿曰大夫士有常宗則
大夫有百世不遷之大宗有五世則遷之小宗是大
祖之廟常不遷也特祭法曰大夫三廟考與王考皇

考有廟顯考祖考無廟而鄭氏遂以為周大夫之制
誤矣 又曰父以明察下故曰昭子以敬事上故曰
穆宗廟有迭毀昭穆則一成而不可易春秋傳言大
王之昭王季之穆又言文之昭武之穆此世序之昭
穆不可易也周官冢人先王之葬居中以昭穆為左
右此葬位之昭穆不可易也儀禮卒哭以其班祔禮
記曰祔必以其昭穆此祔位之昭穆不可易也司士
凡祭祀賜爵呼昭穆而進之祭統凡賜爵昭與昭齒

穆與穆齒此賜爵之昭穆不可易也大傳曰合族以食序以昭穆此合食之昭穆不可易也生而賜爵合食死而葬祔皆以世序而不可易則廟之昭穆可知矣其制蓋祖廟居中而父昭在左子穆在右始死者昭邪則毀昭廟始死者穆邪則毀穆廟昭與昭為列而無嫌乎子加於父穆與穆為列而無嫌乎父屈於子猶之賜爵也子與祖齒而無嫌乎卑者先父與孫齒而無嫌乎尊者後猶之立尸也子無嫌乎南面而

坐父無嫌乎北面而事之則昭穆之不互易不足怪也先儒謂周藏先公木主於后稷之廟先王木主穆在文王廟昭在武王廟於理或然

山陰陸氏曰三昭三穆與大祖之廟而七其序如此所謂率親等而上之者也即言士二廟亦何嫌於降殺以兩不及也 又曰昭穆者父子之號昭以明下為義穆以恭上為義方其為父則稱昭取其昭以明下也方其為子則稱穆取其穆以恭上也豈可膠哉

張璠何洵直謂昭常為昭穆常為穆左者不可遷於右右者不可遷於左既為昭矣又有時而為穆是亂昭穆之名此說非也苟為昭者不復為穆為穆者不復為昭則是昔常事父為之子者今雖有子不得為父苟復為父則以為是亂父子之名可乎 又曰大祖之廟百世不遷三昭三穆親盡則迭毀如周以后穆為大祖王季為昭文王為穆武王為昭成王為穆康王為昭昭王為穆此七世也其後穆王入廟王季

親盡而遷則文王宜自右而左居昭位武王宜自下而上居穆位成王昭王宜居昭位康王穆王宜居穆位所謂父昭子穆是也說者或以左傳大伯虞仲大王之昭虢仲虢叔王季之穆管蔡邶霍文之昭也邗晉應韓武之穆也又以書稱穆考文王乃謂文王世次居穆武王世次居昭王季親盡而遷則武王入王季之廟為昭文王仍為穆康王入武王之廟為昭成王仍為穆穆王入康王之廟為昭昭王仍為穆即是

觀之子復為昭父更為穆尊卑失序亂昭穆非禮意
竊以為世次與廟制不同世次無遷法而廟制親盡
則移蓋周自后稷至文武十有六世此世次也世次
無遷法故自不窋為昭鞠陶為穆推遷而下王季當
昭次文王當穆次故左傳以世次推之則昭生穆穆
生昭而大伯虞仲管蔡邲霍於周為昭虢仲虢叔邴
晉應韓於周為穆杜預所謂以世次計故大伯虞仲
於周為昭是也王者世次雖歷無窮而廟祀七世禮

有迭毀如王季親盡而遷則昭穆移易有如文王今弗與王季對而對武王則父道在文王武王宜居穆廟成王今弗與武王對而對昭王則父道在成王昭王宜居穆廟豈可不即七廟分定昭穆而欲放先儒遠攀世次令文王廟常為穆武王廟常為昭乎蓋王者廟事七世以事生之禮事之至其去祧為壇為墀則與事生異矣故國語曰工史書世宗祝書昭穆知廟次昭穆與世次異矣且禮緣人情而作父昭子穆

其亦何常之有對父則身為之穆對子則身為之昭
故周廟王季一遷則昔之右者今左左者今右矣至
於酒誥所謂穆考文王則如詩之昭考烈考云爾或
者又以檀弓云明日祔於祖父則孫從王父之位亦
卑壓尊何以無嫌竊以為不然蓋祔廟與遷廟異故
周卒哭而祔練而後遷廟練與卒哭相去甚遠何以
證遷廟之法且穆王初祔未練則王季未遷昭穆未
動與祖昭穆同班則祔於康王之廟所謂祔於祖父

也祔於祖父則非專其廟而襲其處自無壓父之嫌
禮曰君子抱孫不抱子以孫與祖昭穆同如王季既
遷文王居昭成王昭王次焉武王居穆康王穆王次
焉所謂孫與祖昭穆同者也周官小宗伯既掌辨廟
祧之昭穆小史又掌奠繫世辨昭穆則明世次先後
與廟祧之昭穆異矣至於大禘遷廟之主陳於大祖
未遷廟之主皆升合食於大祖則自大祖以來祧主
咸在其昭穆即依世次與七廟常祀昭穆不同故小

史又曰大祭祀以書敘昭穆之俎簋也說者以為昭常為昭穆常為穆則王季雖遷而廟中常祀尚用不密以來世次則昭穆一定何必辨而敘之唯其遷易不常故使辨而敘之也說者又謂劉歆曰孫居王父之處正昭穆則孫常與祖相代此遷廟之殺也先儒以為孫從王父之位則是以為孫居王父之處則非矣故記曰殤者從祖祔食蓋王父在廟其孫從之非謂入其廟與祖相代者入其廟而襲其處是不然也

張純曰父子不並坐而孫從王父此言祖孫可以並
今則知與遷法王父去祧孫襲其廟異矣且孫從王
父之說本施於祔故禮曰從祖祔食至於迭遷則王
父去廟而孫襲王父之廟則祖自於彼孫自於此不
得謂之從也說者又謂廟次以子代父古無此理亦
已惑矣王藻曰適子冠於阼以著代也以子代父理
固然矣孰曰廟次不得以子代父乎儀禮將旦而祔
此祔廟之法也非闕遷廟也禮記祔葬者不筮宅祔

必以其昭穆此祔葬之法也非闕遷廟也又曰殤者
從祖祔食此祔祭之法也非闕遷廟也又曰殷朝而
殯於祖此殯之法也非闕遷廟也然則孫從王父皆
以祔祖而言則與遷廟異明矣祭統曰昭穆者所以
別父子遠近長幼親疏之序故有事於大廟則昭穆
咸在而不失其倫若昭常為昭穆常為穆則子或壓
父尊卑失敘豈所謂不失其倫者邪

何氏

洵直

曰案古者宮寢宗廟皆以孫居王父之處

而不以子代父自始祖之後父曰昭子曰穆孫為昭
曾孫為穆玄孫弔孫復為昭來孫仍孫復為穆謂之
昭穆通於存亡居昭位者不可遷於穆行居穆行者
不可入於昭位本之於經質之於傳驗之以先儒之
說根據盤互枝連葉貫論議符合如出一人請得條
別而陳之夫禮常以孫從王父何哉以世次言之則
昭穆偶爾相值故學者以為祖孫同班又曰於義一
體以禮趣求之蓋數始於一立於二成於三故道生

一一生二二生三而人之族屬至於三則備矣小宗
伯掌三族之別以辨親疏鄭氏以三族謂父子孫人
屬之正名先王於此別恩義等親疏而服制皆起於
是焉喪服小記曰親親以三為五以五為九上殺下
殺旁殺而親畢以氏族言之則公孫之子以王父字
為氏是以禮有三本而先祖為類之本此孫從王父
之義也何謂宮寢宗廟皆以孫居王父之處曰春秋
書高寢路寢小寢何休曰父居高寢子居路寢孫從

王父母䟽義謂孫死亦從王父母是殯於其宮之西序矣殷則殯於祖廟之兩楹間設朝而殯於祖是也及冢人辨其兆域則以昭穆為左右至卒哭明日又各從其昭穆祔於祖父女子則祔皇祖妣婦則祔皇祖姑故曰以其班祔以士大夫為言若祖爵尊則祔於諸祖父為士大夫者若無可以祔或王父母在則越曾祖一世當為壇而祔高祖若又無可以祔則越高祖之父一世祔高祖之祖記所謂亡則中一以上

而祔必以其昭穆者也以諸侯五廟為言祔祭既畢則主復於殯宮之寢如既祫主還其廟然也練而后遷廟於是以始祔之孫入王父廟以王父入高祖廟以高祖之主藏於大祖廟春秋穀梁傳曰作主壞廟有時日於練焉壞廟壞廟之道易檐可也改塗可也范甯曰親過高祖則毀其廟將納新神故示有所加孔穎達曰練時壞祖與高祖之廟改塗易檐示有壞意以其高祖入於大祖之廟其祖祔入高祖廟其新

神入祖廟是練時遷廟也遷廟以孫代王父取其昭穆相當所以壞祖與高祖廟而不毀曾祖廟爾前漢劉歆之論最博而篤曰孫居王父之處正昭穆則孫常與祖相代此遷廟之殺也今之說者曰祔廟與遷廟異是不然也至祥禫既終而合食於祖則室中之位大祖西方東向大祖之子為昭北方南面大祖之孫為穆南方北面差次而東孫與王父並列下達於禰張純曰父子不並坐而孫從王父王肅引賈逵說

吉禘於莊公曰遷主遞位孫居王父之處是也雖祭
殤與無後亦以孫從王父記曰從祖祔食蓋曰自祭
於殤在於父廟祭無後兄弟當就祖廟祭無後諸父
當於曾祖廟各從其班也祭成人者必有尸尸必以
孫孫幼則使人抱之皆衣其祖之遺衣服而坐於祖
主之左然於祭者則子行也父北面而事之故曰君
子抱孫不抱子子不可以為父尸以其異昭穆而祖
孫則同耳祭統曰羣昭羣穆咸在而不失其倫謂同

宗人皆來助祭也又曰昭為一穆為一昭與昭蓋穆與穆蓋賈公彥曰昭穆在助祭之中者皆在東階之前南陳假令父行為昭子行為穆孫行還為昭曾孫行還為穆就昭穆中各以年長者在上幼者居下故云齒也夫古者葬祔以其班祫以其班為尸及賜爵以其班故昭常為昭穆常為穆義據明白有如日星說者謂父昭子穆何常之有對父則身為之穆對子則身為之昭其意以為廟次與世次不同故昭穆遷

從無常位右者可移之左左者可移之右殊不知廟
次與世次一也廟次雖遷唯昭穆之班一定不移祖
以傳孫孫以傳子縱歷百世其當為昭當為穆者未
之有改也如武王之時廟次以文王為穆至襄王之
世凡歷十八君矣猶謂之穆左氏載富辰之語曰管
蔡邠霍魯衛毛聃郟雍曹滕畢原鄆郇文之昭也十
八國文王之子文王於廟次世次皆當為穆故謂其
子云文之昭也康王時廟次以武王為昭至襄王之

世猶謂之昭富辰曰邠晉應韓武之穆也四國武王之
子武王與廟次世次皆當為昭則謂其子曰武之
穆也至於宮之竒謂大伯虞仲為大王之昭虢仲虢
叔為王季之穆與此同意夫文王大王其子對父皆
稱昭曰文王之昭大王之昭武王王季其子對父皆
稱穆曰武王之穆王季之穆其為子一也對父或稱
昭或稱穆知昭穆為定班而廟次世次未始異也書
曰七世之廟記曰天子七廟三昭三穆書言世而禮

言昭穆則世與昭穆無不同之理說者引魯語曰工
史書世宗祝書昭穆知廟次昭穆與世次異臣以為
不然工史所書者帝繫世本之屬宗祝所書者几筵
表著之位自其譜謀則謂之世據其班秩則謂之昭
穆此離而言之者也又楚語曰宗廟之事昭穆之世
此合而言之者也既曰昭穆之世則廟次昭穆果與
世次不同乎經傳之言既然矣觀先儒之論則韋玄
成曰父為昭子為穆孫復為昭杜預曰穆生昭昭生

穆漢帝詔曰孝宣皇帝為孝昭皇帝後為義一體顏師古曰一體謂俱為昭也禮孫與祖俱為昭

鄭氏曰周以文武為二祧藏遷主文為穆祧為昭主武為昭祧為穆主此先儒論昭穆一定不易皆與經合但祭法遠廟為祧而鄭氏以文武為之蓋非是也說者曰穆王入廟王季親盡而遷則文王宜自右而左居昭位武王宜自下而上居穆位必如此言則世次廟次常以子代父古無此理又曰王季既遷文王

居昭成王昭王次焉武王居穆康王穆王次焉所謂
孫與祖昭穆同臣謂此非禮意何者葬與祔祫皆以
孫從王父其無祖可祔者必中一以上祔於高祖論
其為尸則抱孫不抱子是昭自昭班穆自穆班故曰
孫與祖同若謂祖遷於上則孫與玄孫皆次之昔以
為穆今復為昭昔以為昭今更為穆以葬位祔位祫
位尸位觀之皆顛倒失序是徒知有昭穆之名不知
有昭穆之班何所謂孫與祖同故曰此非禮意竊嘗

以為王制天子七廟三昭三穆與大祖之廟而七此據迭毀為言也祭法王立七廟一壇一墀曰考廟曰王考廟曰皇考廟曰顯考廟曰祖考廟遠廟為祧有二祧去祧為壇去壇為墀此據定體為言也迭毀者言乎其動也言乎其動則云三昭三穆而孫代王父之意寓於其中矣定體者言乎其常也言乎其常則云考與王考至於遠廟去壇而墀遷祖遞位之義亦不外是矣祧與遷廟雖非一時然均名昭穆豈有二

位祔則孫從王父合食遷則孫常與祖相代者入其廟而襲其處如劉歆王肅之論是也既生居王父之寢沒則殯於其宮之西序葬與祔祫俱從祖列至其為尸亦襲祖之遺衣服而坐於其主之左助祭賜爵各以昭穆序以受氏命族又以王父之序是無所不用其班何獨遷廟則以子代父而亂其班乎說者又引適子冠於阼為證蓋亦不類記曰適子冠於阼以著代明其代父傳重其堂祖統昭穆相代也

又曰禮記天子七廟三昭三穆與大祖之廟而七諸
侯二昭二穆與大祖之廟而五大夫一昭一穆與大
祖之廟而三謂之祖則一而大以昭穆媿焉則二而
小一而大者無對故其位居中而不以昭穆居之且
世世不毀二而小者有對故斷自始祖之後父曰昭
子曰穆至親盡則迭遷后稷為周祖其子不窋曰昭
其孫鞠陶曰穆周公為魯祖其子伯禽曰昭其孫考
公曰穆萬物本乎天人本乎祖祖者天也昭居左為

陽穆居右為陰以三昭三穆言之則一為昭二為穆
三為昭四為穆五為昭六為穆一三五者陽奇之數
也二四六者陰耦之數也自一世推而至百世皆然
昭者有昭班與陽奇同類穆者有穆班與陰耦同類
故葬與祔祔必以孫從王父蓋神得同班同類則為
安也昭之王父以昭孫為尸穆之王父以穆孫為尸
蓋神得同類則憑依之也夫奇耦為定數左右為定
位昭穆為定班若曰右者可移之左左者可移之右

猶陽竒有時為耦陰耦有時為竒班類顛錯尊卑失
序矣周禮冢人掌公墓之地先王之葬居中以昭穆
為左右是葬位有昭穆儀禮曰卒哭明日以其班祔
禮記曰祔必以其昭穆亡則中一以上而祔是祔位
有昭穆大禘室中大祖東向昭南面穆北面父子不
並坐而孫從王父是禘位有昭穆孫為王父尸子不
可為父尸是尸位有昭穆天子七廟三昭三穆諸侯
五廟二昭二穆大夫三廟一昭一穆是廟位有昭穆

葬位之昭穆一定不移則祔可知也祔位之昭穆一定不移則祫可知也祫位之昭穆一定不移則尸可知也尸位之昭穆一定不移則廟可知也葬位祔位祫位尸位廟位五者均謂之昭穆豈有二義哉在葬位為昭則於祔位祫位尸位廟位俱為昭在葬位為穆則於祔位祫位尸位廟位俱為穆今之說者曰父昭子穆何常之有對父則為穆對子則為昭故有在廟位為昭而於祔位祫位為穆在廟位為穆而於祔

位禘位為昭失禮意矣王季之時以大王為穆至惠
王時歷十八君而謂之穆文王之時以王季為昭至
惠王時歷十八君而謂之昭宮之竒曰大伯虞仲大
王之昭號仲號叔王季之穆大伯虞仲者大王之子
號仲號叔者王季之子大王於廟次世次為穆故謂
其子為昭王季於廟次世次為昭故謂其子為穆武
王時廟次以文王為穆康王時廟次以武王為昭至
襄王之世亦謂其子曰文王之昭武王之穆周大夫

富辰既言之矣曹伯之臣侯孺又曰曹叔振鐸文之
昭也先君唐叔武之穆也襄王距文王之時無慮十
有八世景王之子恭王距襄王又七世而遠魯定公
四年衛大夫祝鮀之言猶曰曹文之昭晉武之穆繇
此論之昭常為昭穆常為穆雖百世無易也始祖之
位定則昭穆從而正始祖之位不定則昭穆從而不
正漢以大上廟主瘞於陵園而悼皇考序於昭穆是
高皇帝以有功加其父史皇孫以旁支干大統有以

知漢之昭穆不正也唐以景皇帝為大祖而上有獻
懿二祖貞元中用陳京議遷獻懿於別廟而景皇帝
正東向之位有以知唐之昭穆不正也漢唐猶然又
況晉隋五代之末造乎祖位定而昭穆正者殷周與
本朝是也

張氏琛曰以周制言之王季為昭文王為穆武王為

昭成王為穆則所謂父昭子穆也然則王季親盡其
廟既遷武王自右而上從王季之位而不嫌尊於文

王何也蓋昭穆以定位也武王既為昭矣則其位在左自為尊卑而無與於文王之穆也又四時常祀各於其廟不偶坐而相臨此其所以進居王季之位而不嫌尊於文王也及乎合食於大祖之廟則王季文王更為昭穆而世次雖遠不可謂無尊卑之序矣蓋禮有三本而祖者類之本故孫常從祖而不從父所以不從父者不獨嚴重本之義亦嫌於代父也是以武王常從王季而為昭成王常從文王而為穆故廟

制世次並行而不相害今若以王季親盡毀廟文王
自右而左居昭位武王自下而上居穆位及合饗之
祭而文王復為穆武王更為昭則是一身既為昭矣
又有時而為穆既為穆矣復有時而為昭不惟亂昭
穆之名又考之經傳無所據矣且生而居處沒而殯
葬以至祔祭入廟為尸賜爵皆孫從祖而不從父所
以昭穆常用世次奚至於廟次獨不然乎

新安朱氏曰昭之為言明也以其南面而向明也其

讀為韶先儒以為晉避諱而改之然禮書亦有作韶
字者則假借而通用耳或問曰其為向明何也曰此
不可以空言曉也今且假設諸侯之廟以明之蓋周
禮建國之神位左宗廟則五廟皆當在公宮之東南
矣其制則孫毓以為外為都宮大祖在北二昭二穆
以次而南是也蓋大祖之廟始封之君居之昭之北
廟二世之君居之穆之北廟三世之君居之昭之南
廟四世之君居之穆之南廟五世之君居之廟皆南

向各有門堂室寢而墻宇四周焉大祖之廟百世不
遷自餘四廟則六世之後每一易世而一遷其遷之
也新主祔於其班之南廟南廟之主遷於北廟北廟
親盡則遷其主於大廟之西夾室而謂之祧凡廟主
在本廟之室中皆東向及其祫於大廟之室中則惟
大祖東向自如而為最尊之位羣昭之入乎此者皆
列於北牖下而南向羣穆之入乎此者皆列於南牖
下而北向南向者取其向明故謂之昭北向者取其

深遠故謂之穆蓋羣廟之列則左為昭而右為穆祫祭之位則北為昭而南為穆也曰六世之後二世之主既祧則三世為昭而四世為穆五世為昭而六世為穆乎曰不然也昭常為昭穆常為穆禮家之說有明文矣蓋二世祧則四世遷昭之北廟六世祧昭之南廟矣三世祧則五世遷穆之北廟七世祧穆之南廟矣昭者祧則穆者不遷穆者祧則昭者不動此所以祧必以班尸必以孫而子孫之列亦以為序若武

王謂文王為穆考成王稱武王為昭考則自其始祔而已然而春秋傳以管蔡邲霍為文之昭邲晉應韓為武之穆則雖其既遠而猶不易也豈其交錯彼此若是之紛紛哉曰廟之始立也二世昭而三世穆四世昭而五世穆則固當以左為尊而右為卑矣今乃三世穆而四世昭五世穆而六世昭是則右反為尊而左反為卑也而可乎曰不然也宗廟之制但以左右為昭穆而不以昭穆為尊卑故五廟同為都宮則

昭常在左穆常在右而外有以不失其序一世自為
一廟則昭不見穆穆不見昭而內有以各全其尊必
大禘而會於一室然後序其尊卑之次則凡已毀未
毀之主又畢陳而無所易唯四時之禘不陳毀廟之
主則高祖有時而在穆其禮未有考焉意或如此則
高之上無昭而特設位於祖之西禰之下無穆而特
設位於曾之東也與曰然則毀廟云者何也曰春秋
傳曰壞廟之道易檐可也改塗可也說者以為將納

新主示有所加耳非盡撤而悉去之也曰然則天子之廟其制若何曰唐之文祖虞之神宗殷之七世三宗其詳今不可考獨周制猶有可言然而漢儒之記又已有不同矣謂后稷始封文武受命而王故三廟不毀與親廟四而七者諸儒之說也謂三昭三穆與太祖之廟而七文武為宗不在數中者劉歆之說也雖其數之不同然其位置遷次宜亦與諸侯之廟無甚異者但如諸儒之說則武王初有天下之時后稷

為大祖而組紂居昭之北廟大王居穆之北廟王季居昭之南廟文王居穆之南廟猶為五廟而已至成王時則組紂祧王季遷而武王祧至康王時則大王祧文王遷而成王祧至昭王時則王季祧武王遷而康王祧自此以上亦皆且為五廟而祧者藏於大祖之廟至穆王時則文王親盡當祧而以有功當宗故別立一廟於西北而謂之文世室於是成王遷昭王祧而為六廟矣至共王時則武王親盡當祧而亦以

有功當宗故別立一廟於東北謂之武世室於是康
王遷穆王祔而為七廟矣自是以後則穆之祧者藏
於文世室昭之祧者藏於武世室而不復藏於大廟
矣如劉歆之說則周自武王克殷即增立二廟於二
昭二穆之上以祀高圉亞圉如前遞遷至於懿王而
始立文世室於三穆之上至孝王時始立武世室於
三昭之上此為少不同耳曰然則諸儒與劉歆之說
孰為是曰前代說者多是劉歆愚亦意其或然也然

則大夫士之制奈何曰大夫三廟則視諸侯而殺其
二然其大祖昭穆之位猶諸侯也適士二廟則視大
夫而殺其一官師一廟則視大夫而殺其二然其門
堂室寢之備猶大夫也曰廟之為數降殺以兩而其
制不降何也曰降也天子之山節藻梲複廟重檐諸
侯固有所不得為者矣諸侯之黜堊斲大夫有不
得為者矣大夫之倉楹斲士又不得為矣曷為而
不降哉獨門堂室寢之合然後可名於宮則其制有

不得而殺耳蓋由命士以上父子皆異宮生也異宮而死不得異廟則有不得盡其事生事存之心者是以不得而降也曰然則後世公私之廟皆為同堂異室而以西為上者何也曰由漢明帝始也夫漢之為禮略矣然其始也諸帝之廟皆自營之各為一處雖其都宮之制昭穆之位不復如古然猶不失其獨專一廟之尊也至於明帝不知禮義之正而務為抑損之私遺詔藏主於光烈皇后更衣別室而其臣子不

敢有加焉。魏晉循之，遂不能革。而先王宗廟之禮，始盡廢矣。降及近世，諸侯無國，大夫無邑，則雖同堂異室之制，猶不能備。獨天子之尊，可以無所不致。顧乃桮於漢明，非禮之禮，而不得以致其備。物之孝，蓋其別為一室，則深廣之度，或不足以陳鼎俎。而其合為一廟，則所以尊其大祖者，既褻而不嚴，所以事其親廟者，又厭而不尊。是皆無以盡其事，生事存之心。而當世宗廟之禮，亦為虛文矣。宗廟之禮，既為虛文，而

事生事存之心有終不能以自己者於是原廟之儀

不得不盛然亦至於我朝而後都宮別殿前門後寢

始略如古者宗廟之制是其沿襲之變不唯窮鄉賤

士有不得聞而自南渡之後故都淪沒權宜草創無

復舊章則雖朝廷之上禮官博士老師宿儒亦莫有

能知其原者幸而或有一二知經學古之人乃能私

議而竊嘆之然於前世則徒知譏孝惠之飾非責叔

孫通之舞禮而於孝明之亂命與其臣子之苟從則

未有正其罪者於今之世則又徒知論其惑異端徇
流俗之為陋而不知本其事生事存之心有不得伸
於宗廟者是以不能不自致於此也抑嘗觀於陸佃
之議而知神祖之嘗有意於此然而考於史籍則未
見其有紀焉若曰未及營表故不得書則後日之秉
史筆者即前日承詔討論之臣也所宜深探遺旨特
書總敘以昭示來世而略無一詞以及之豈天未欲
使斯人者復見二帝三王制作之盛故尼其事而嗇

其傳邪嗚呼惜哉然陸氏所定昭穆之次又與前說不同而張操之議庶幾近之讀者更詳考之則當知所擇矣 或謂大夫不得祭始祖此天子諸侯之禮又云大夫自無大祖答曰春秋如單氏尹氏王朝之大夫自上世至後世皆不變其初來姓號則必有大祖又如季氏之徒世世不改其號則亦必有大祖或云此春秋時世卿不由天子都沒理會答曰非獨春秋時如詩中說南仲大祖大師皇父南仲是文王時

人到宣王時為大祖不知古者世祿不世官之說如何又如周公之後伯禽已受封於魯而周家世有周公如春秋云宰周公這般所在自曉未得

語錄

又

曰今天下有二件極大底事其一是天地同祭於南郊其一是大祖不特立廟而與諸祖同一廟自東漢以來如此 又曰孫毓云外為都宮大祖在北二昭二穆以次而南出江都集禮向作或問未見此書只以意料乃知學不可不博

禮記集說卷三十

謹案第五頁後一行詞間容之有不必也句疑有誤

第二十四頁前三行又况主祭自有宗子刊本主
訛祖今改

第二十六頁後六行文武之二祧親廟四而已刊
本之訛而今改

第五十一頁後六行又如季氏之徒刊本季訛季
今改



覆校官編修臣項家達

校對官檢討臣王坦修

謄錄監生臣王肯勵

欽定四庫全書薈要

經部
禮記集說卷三十一



詳校官編修臣程嘉謨

欽定四庫全書薈要卷二千一百五十九

經部


禮記集說卷三十一

宋

衛湜

撰

天子諸侯宗廟之祭春曰禘夏曰禘秋曰嘗冬曰烝

鄭氏曰此蓋夏殷之祭名周則改之春曰祠夏曰禘
禘為殷祭詩小雅曰禘祠烝嘗于公先王此周四

時祭宗廟之名

孔氏曰自此至地者一節論夏殷天子諸侯大夫四
時祭宗廟及祭天地山川之事禘薄也春物未成其

祭品鮮薄也禘者次第也夏時物雖未成宜依時次第而祭之嘗者新穀熟而嘗之烝者衆也冬之時物成者衆又烝進也進品物也祭名與周不同故以為夏殷之祭又無文故稱蓋以疑之此云春禘而郊特牲云春禘者鄭彼註云禘宜為禴從此為正祭義曰春禘鄭註直云夏殷禮不破禘字者已見郊特牲註故略之也鄭知周春曰祠夏曰禘者案宗伯云以祠春享先王以禴夏享先王知以禘為殷祭者公羊傳

曰五年而再殷祭又春秋僖八年秋七月禘于太廟是禘為殷祭殷大也謂五年一大祭引詩小雅是文王天保之詩謂文王受命已改殷之祭名以夏祭之禘改名曰禘而詩先禘後祠從便文嘗在烝下以韻句也于公諸盥至不窋也先王謂后稷太王王季也長樂陳氏曰禘禘以飲為主所以順乎陽烝嘗以食為主所以順乎陰春禘夏禘秋嘗冬烝此殷祭也殷以長發為大禘言大以見小則夏禘小禘也郊特牲

祭義言春禘蓋夏禮也

馬氏曰此宗廟四時之常祭也禘以飲為主而養死者之陽氣故春則謂之禘而禘必於仲夏而陽氣在上陰氣在下所以審諦昭穆也故夏則謂之禘嘗以食為主而養死者之陰氣故秋則謂之嘗烝衆也萬物盛多可以備禮故謂之烝此虞夏之制也而周則變禘而為祠變禘而為禴而禘則謂之大祭故周官以祠春享先王以禴夏享先王而詩序亦曰雖禘大

祖也

山陰陸氏曰春祠夏禘秋嘗冬烝正也春夏以飲為主審諦之時也春可以謂之禘亦可以謂之禘夏可以謂之禘亦可以謂之禘郊特牲曰春禘而秋嘗王制曰春禘夏禘是也祠品物少文詞多春之事而已故夏未有言祠者凡此三代共之先儒謂周曰祠誤矣且方言祭又不備舉祠不足言也故禮言春禘夏禘言道嘗言物故禮言春禘秋嘗詩曰禴祠烝嘗

稱祠者四時之祭備舉不嫌也大司馬言享祔不言祠言享烝不言嘗亦以其盛者言之

虞氏曰周禮大宗伯之職云以祠春享先王以禴夏享先王以嘗秋享先王以烝冬享先王司尊彝亦言春祠夏禴秋嘗冬烝此四時之祭名也考之王制則曰春曰禘夏曰禘祭統亦曰春祭曰禘夏祭曰禘又與周禮所言春夏之制相反矣考之郊特牲則曰春禘而秋嘗祭義亦曰君子合諸天道春禘秋嘗又與

王制祭統所言春夏之祭相反矣鄭康成之說以春
禘夏禘為夏殷之祭周則改之亦無明文可據蓋康
成以意揣之也至於郊特牲言春禘鄭氏釋之曰禘
當為禘字之誤也意謂王制祭統既言春禘則此不
當言春禘故以為禘字之誤然則祭義又言春禘豈
有二篇之文皆誤哉此不通之論也竊嘗以意求之
周官所言春祠夏禘此周禮也王制祭統所言春禘
夏禘此殷之禮也郊特牲祭義所言春禘此夏之禮

也何以知之記曰殷人尚聲樂三闋然後出迎牲又
曰樂陽氣也又曰殷人先求諸陽則殷祭皆用樂矣
郊特牲所言春禘而秋嘗而先之以享禘有樂而食
嘗無樂則為夏禮非殷禮也春禘既為夏禮則春禘
自得為殷禮矣

江陵項氏曰一歲四祭春曰祠夏曰禴秋曰嘗冬曰
烝所以待未毀廟之主凡天子至於庶人皆得用之
獨無田者謂之薦耳三歲一祭曰禘所以待既毀廟

之主自天子至於大夫用之以其有太祖之廟可以藏毀廟之主也五歲一祭曰禘所以報其繼天受形之祖則惟天子獨得用之蓋自其祖而上之至於天地之初賦形之始繼天而生者禮至於此不可復加非有天下者其孰得而行之哉

天子祭天地諸侯祭社稷大夫祭五祀天子祭天下名山大川五嶽視三公四瀆視諸侯諸侯祭名山大川之在其地者

鄭氏曰五祀謂司命也中雷也門也行也厲也此祭謂大夫有地者其無地祭三耳視三公視諸侯視其牲器之數也諸侯祭名山大川若魯人祭泰山晉人祭河是也

孔氏曰案祭法云王立七祀曰司命曰中雷曰國門曰國行曰泰厲曰戶曰竈諸侯五祀無戶竈自外與天子同明大夫五祀與諸侯同是司命中雷門行厲也以其祭五祀與諸侯同故知大夫有采地者鄭註

無地祭三者以祭法云大夫立三祀曰族厲曰門曰行也鄭意以此及祭法俱是周禮有地者祭五無地者祭三案上曲禮大夫祭五祀謂戶竈中雷門行為殷禮此大夫五祀為有地大夫五祀之神又別者以曲禮天子諸侯大夫皆祭五祀更無差等故以月令五祀當之總為殷禮此文云天子祭天地諸侯祭社稷大夫祭五祀既別為尊卑之差故以周法解之也夏傳云五嶽視三公四瀆視諸侯其餘山川視伯

小者視子男鄭註云謂其牲幣粢盛籩豆爵獻之數

非謂尊卑也案周禮上公饗餼九牢飧五牢享禮九

獻豆四十侯伯饗餼七牢飧四牢享禮七獻豆三十

有二子男饗餼五牢飧三牢享禮五獻豆二十有四

又五等諸侯膳皆大牢祭亦大牢簋皆十有二又侯

伯無別三公與子男同今王制則三公尊於諸侯夏

傳則伯與侯別參驗上下並與周禮不同不可強解

此王制所陳多是夏殷之制夏傳所說亦非周代之

禮則鄭所註者當據異代法也此經云四瀆視諸侯以夏傳言之則侯是侯爵者非五等諸侯也知魯人祭泰山者以論語曰季氏旅於泰山明魯君祭泰山季氏僭之也但泰山是齊魯之界故齊亦祭之禮器云齊人有事泰山又云晉人有事於河是也

秦溪楊氏曰舜望秩于山川秩序也以次序而祭之五嶽視三公四瀆視諸侯特言其禮有隆殺重輕耳註疏拘於牲幣粢盛籩豆爵獻之數失於太泥遂至

于不可強解不必然也

馬氏曰天子祭天地諸侯祭社稷大夫祭五祀所以報本反始抑以防僭亂之階也蓋天地者有域之最大者也而天子者域中之所尊也故祭天地社稷者土穀之神也而諸侯者為天子守土也故祭社稷大夫則有家故祭五祀蓋在上者可以兼下故天子祭天地社稷五祀在下者不可以兼上故諸侯祭社稷而不得祭天地大夫祭五祀而不得祭社稷荀子曰

郊止乎天子社止乎諸侯道及乎大夫是也古之為
祀典有功于民則祀之而名山大川者有功于民而
民之取材用也蓋天子君天下而其所報者衆故祭
天下之名山大川諸侯君一國而其所報者寡故祭
名山大川之在其地者

延平周氏曰祭社稷者不得祭天地祭五祀者不得
祭社稷故祭法曰大夫以下成羣立社曰置社天子
百神之主故祭天下之名山大川諸侯境內之主唯

名山大川之在境內者則祭之

講義曰天子祭天地謂祭天神于南郊祭地祇于北郊也諸侯祭社稷謂社為五土之神稷為五穀之神也大夫祭五祀謂祭司命中雷門行厲也經言五祀多矣月令則戶竈中雷門行也祭法則司命中雷國門國行公厲也曲禮兼言天子諸侯大夫之祭五祀故釋者與月令同此言大夫祭五祀以別于天子諸侯故釋者與祭法同

山陰陸氏曰三公坐而論道諸侯朝宗者也

廣漢張氏曰古者諸侯各得祭其境內山川山川所以為神靈者以其氣之所感能出雲雨潤澤羣物是故為之壇壝立之祝史設之牲幣所以致吾禱祝之實而交乎乎隱顯之際誠之不可掩如此後世有山川之祠而人其形宇其地則其失久矣夫山峙川流是其形也而人之也何居其氣之流通可以相接也而宇之也何居無其理而強為之雖百拜而祈備物

以享其有時而應亦偶然而已

新安朱氏曰一家之主則一家鬼神屬焉諸侯守一國則一國鬼神屬焉天子有天下則天下鬼神屬焉看來為天子者這一個神明是甚麼大如何有些子差忒得若縱欲無度天上許多星辰地下許多山川如何不變怪

語錄

又曰古人祭山川只是設壇位以祭之祭時便有祭了便無故不至褻瀆後世却先立箇廟貌如此所以

反致惑亂人心僥求非望無所不至

天子諸侯祭因國之在其地而無主後者

鄭氏曰謂所因之國先王先公有功德宜享世祀今絕無後為之祭主者昔夏后氏郊鯀至祀為夏後而更郊禹晉侯夢黃熊入國而祀夏郊此其禮也

孔氏曰此一節論天子置都之所及諸侯所封之內皆因古昔先王先公所居之地今其地子孫絕滅而無主後者則天子諸侯祭之祭法夏后氏禘黃帝而

郊鯨禮運祀之郊也禹也殷滅夏必不郊鯨必應封
夏後但知名祀與否至周封夏後于祀不廢殷時
夏後已郊禹也晉侯夢黃熊事見昭七年左傳晉侯
有疾夢黃熊入于寢門韓宣子問于產子產曰昔堯
殛鯨于羽山其神化為黃熊以入羽淵實為夏郊三
代祀之晉為盟主或者未之祀也據傳意謂晉為盟
主當代天子攝羣神之祀不謂因此國在地無主後
者鄭引之者以證晉居夏之舊地鯨無主後故晉祀

之

石林葉氏曰亡國絕世而無主後者雖已廢而不可
舉然先王興滅繼絕而因國亦祭者所以見其仁也
廬陵胡氏曰因國謂所都所封之內因古先聖哲所
居之地若晏子云爽鳩氏始居此地而後季荊因之
有逢伯陵因之蒲姑氏因之而後大公因之之因也
天子牲禘祫禘祫嘗禘祫燔諸侯禘則不禘禘則不嘗嘗
則不燔燔則不禘諸侯禘牲禘一牲一祫嘗禘燔禘

鄭氏曰牲猶一也禘合也天子諸侯之喪畢合先君之主于祖廟而祭之謂之禘後因以為常天子先禘而後時祭諸侯先時祭而後禘凡禘之歲春一禘而已不禘以物無成者不殷祭周改夏祭曰禘以禘為殷祭也魯禮三年喪畢而禘于大祖明年春禘于羣廟自爾之後五年而再殷祭一禘一禘也虞夏之制諸侯歲朝故四時禘嘗烝必廢一祭禘牲互明牲禘文也禘一牲一禘下天子也禘歲不禘

孔氏曰此一節論夏殷天子諸侯大祭及時祭之事
天子之祭當禘之歲以春物未成不為禘祭唯牲為
時祭之禘故云牲禘夏秋冬之時先為禘祭後為時
祭故云禘禘禘嘗禘烝也鄭註天子先禘而後時祭
者以經曰禘禘禘嘗禘烝天子位尊故先為大禮也
諸侯先時祭而後禘者以下云嘗禘烝禘諸侯位卑
取其漸備故先小禮後大禮此等皆殷以前之制但
不知幾年一禘禮緯云三年一禘五年一禘鄭云百

王通義則虞夏殷周皆同三年一禘也皇氏以為虞夏禘祭每年皆為又云三時禘者謂夏秋冬或一時得禘則為之不三時俱禘今鄭註云春一禘而已不禘以物無成不殷祭又禘禘志云王制記先王之法禘為大祭禘于秋于夏于冬周公制禮祭不欲數如鄭此言則夏殷三時俱殷祭皇氏之說非也鄭註謂魯禮三年喪畢而禘于太祖者案文二年八月丁卯大事于太廟公羊傳云大事者何大禘也通僖公死

之年為三年也註謂明年春禘于羣廟者案僖公八

年禘于太廟宣八年有事于太廟有事禘也皆八年

禘者既五年一禘則後禘去前禘五年也前禘當三

年今二年而禘故云明年春禘于羣廟案閔二年五

月吉禘于莊公昭十五年禘于武宮昭二十五年將

禘于襄公禘皆各就廟為之故云羣廟註謂自爾之

後五年而再殷祭者公羊傳文自爾謂三年禘羣廟

之後每五年之內再為殷祭故鄭禘禘禘志云閔公之

喪僖三年禘僖六年禘僖八年禘凡三年喪畢二年

為禘三年為禘皆禘在禘前其禘禘大小鄭以公羊

傳云大事者何大禘也毀廟之主陳于大祖未毀廟

之主皆升合食于大祖故為大事若王肅張融孔晁

皆據逸禮以禘為大禘為小鄭不用逸禮又曾子問

云七廟五廟無虛主虛主者唯天子崩與禘祭取羣

廟之主明禘祭不取羣廟之主可知爾雅云禘大祭

也謂比四時為大也若左氏及杜氏則皆以禘為三

年一大祭在大祖之廟傳無祫文然則祫即禘也取其序昭穆謂之禘取其合集羣祖謂之祫註謂虞夏之制者雖明諸代不專殷也又春禘註云夏殷則知夏殷春祭俱名禘也虞夏之制諸侯歲朝皆闕一時之祭此從南方始南方諸侯春禘祭竟夏來朝故闕夏禘故云禘則不禘西方諸侯行夏祭竟而秋來朝故不嘗也北方諸侯行秋祭竟而冬來朝故廢烝東方諸侯行冬祭竟而春來朝故廢禘各廢一時耳餘

三時皆祭也今不從東方始而從南方始者欲舉春
禘得祭者為始故也禘牲者諸侯降于天子故禘在
牲上也欲見先時祭故禘在牲上禘一牲一禘者言
諸侯當在夏祭一禘之時不為禘祭唯牲一禘而已
闕時祭也不云一禘而云禘一者禘在一前與禘在
牲前其義同皆見先時祭也嘗禘烝禘者謂諸侯先
作時祭烝嘗然後為大祭之禘也

趙氏曰禘非時祭之名此文皆漢諸儒約春秋為之

見春秋禘于莊公遂以為時祭之名見春秋惟兩度
書禘一春一夏所以或謂之春祭或謂之夏祭各自
著書不相符會理可見也鄭玄不達其意故註郊特
牲云禘當為禘祭義與郊特牲同遂不註祭統及王
制則云此夏殷時禮也且祭統篇末云成王追念周
公賜之重祭郊社嘗禘是也何得云夏殷禮哉諸侯
禘則不禘以下亦緣見春秋中惟有禘嘗烝三祭謂
魯惟行此三祭遂云爾若信如鄭註諸侯每歲皆朝

即遠國來往須歷數時何獨廢一時而已又須往來常在道路如何守國理民乎又以諸經書之文證之並無說禘為殷祭處則禘不為殷祭明矣殷重大之義也

延平周氏曰天子牲禘諸侯牲而春祭皆無禘何也禘以飲為主禘以食為主故天子諸侯春祭皆無禘天子禘禘是有禘有禘也諸侯禘一牲則不禘一禘則不禘何也方夏之時陽在上陰在下尊卑各正

其位故諸侯夏祭則殺于天子天子禘禘禘嘗禘烝
則是先大祭諸侯嘗禘烝禘則是先時祭何也先大
祭而後時祭者序之常先時祭而後大祭者乃其別
也雖然或疏或數或前或後皆得與時變易要在斟
酌當時之宜而為之節而已此諸侯隨時而朝或有
所闕也

橫渠張氏曰禮不王不禘則知諸侯歲闕一祭為不
禘明矣至周以祠為春以禴為夏宗廟歲六享則二

享四祭為六矣諸侯不禘其四享歟夏殷諸侯夏特
一禘王制謂禘則不禘禘則不嘗假其名以見時祀
之數耳作記者不知文之害意過矣 又曰享嘗云
者享為追享朝享禘亦其一耳嘗以配享亦對舉秋
冬而言也夏殷以禘為時祭知追享之必在夏也然
則夏殷天子歲乃五享禘列四祭并禘而五也周改
禘為禴則天子享六諸侯不禘又歲闕一祭則亦四
而已矣王制所謂天子植禘禘禘嘗禘烝既以禘

為時祭則禘可同時而舉

禘以物薄而
禘嘗從舊

諸侯禘禘

如天

子禘一禘一禘言于夏禘之時止為一祭特一禘而

已然則不王不禘又著見于此矣下又云嘗禘烝禘

則嘗烝且禘無疑矣若周制亦當闕一時之祭則當

云諸侯祠則不禘禘則不嘗 又曰天子禘禘禘禘

禘嘗禘烝知天子廟春禘禘于太祖夏禘秋嘗冬烝

並禘祭于太祖之廟至來歲禘禘于昭廟禘嘗烝亦

禘于太祖之廟又來歲禘禘于穆廟禘嘗烝亦禘于

太祖之廟一年每廟一牲三禘也廟雖多推是而徧如是則牲祭者歲獲四祭餘皆三禘祭也故古有三時之說若此天子乃可以親祭舊說一日徧祭七廟勢不可及雖于書有文王騂牛一武王騂牛一似一日而祭二廟然恐二王在一廟而祭之牲則各異也禘者合羣廟之主禘者推及遠亦合羣主欲知禘之說當如趙伯淳斷然立義禘也禘也郊也必歲有之豈容有三年五年之說嘗禘禘則天子必親行祭事

何故羣廟之主皆在太祖之廟故禮可得而周徧也
若時祭則逐廟行禮勢必十數日仍不得各為齋戒
以是容有司行事乃可以同日而事畢諸侯亦如天
子禘牲但于禘歲一牲歲一禘是於禘二年中一年
牲一年禘也如嘗禘烝禘並如天子唯禘有疏數以
是為殺也假使諸侯有五廟當禘牲于太祖禘牲于
昭則是二廟各獨享一祭并嘗禘烝禘歲各一祭而
已至來歲禘牲于昭禘禘于祖并嘗烝皆禘則昭廟

歲得四祭其餘雖大祖皆三也帝王之大祭諸侯不禘本祖之義也諸侯禘則不禘禘則不嘗嘗則不烝此或是朝覲闕一時祭或傳者因見諸侯不禘遂推類言之大夫士雖廟數不同理必皆禘亦至于高祖以人事觀之安得不祭唯禘請于君有大事省于君是也 又曰天子七廟一日而行則力不給故禮有一牲一禘之說牲則祭一禘則徧祭如春祭高祖夏禘羣廟秋祭曾冬又禘來春祭祖夏又禘秋祭禴

冬又禘

河南程氏曰諸侯亦祭禘只是祠禴嘗烝之祭為廟禮煩故每年于四祭之中三祭合食于祖廟惟春則祭諸廟也

秦溪楊氏曰程子之言正解釋天子植禘禘禘嘗禘烝之義其曰禘合祭也只是禴祠嘗烝之祭為廟禮煩故每年于四祭之中三祭合食于祖廟惟春則祭諸廟此說推明時祭之本意最為明白張子謂禮

有一牲一禘之說正解釋諸侯禘牲一牲一禘嘗

禘烝禘一章但本文言禘嘗烝三祭皆禘惟禘一牲

一禘禮文殘闕指不分明故張子不從其言又別為

之說曰春祀高祖夏禘羣廟秋祭曾冬又禘來春祭

祖夏又禘秋祭禰冬又禘雖一牲一禘之說若可通

但言牲只祭一廟而遺其餘廟恐於人情亦有所不

安不若前程子之言簡而意備也又春祠夏禘秋嘗

冬烝周時祭名詩所謂禴祠烝嘗于公先王是也此

云禘禘嘗烝乃記禮者之誤也 又曰禘祭有二曾
子問曰禘祭于祖則祝迎四廟之主王制云天子禘
嘗禘烝諸侯嘗禘烝禘此時祭之禘也公羊傳曰毀
廟之主陳于大祖未毀廟之主皆升合食于大祖此
大禘毀廟未毀廟之主而祭之也禘祭惟有此二條
此外無餘禮漢儒之論又混禘禘而并言之何其紛
紛多端邪本朝禘禘用鄭康成之說則三年一禘以
孟冬五年一禘以孟夏慶歷中用徐邈之說則每三

十月而一禘後又以二祭各不相因故熙寧八年既禘又禘竟無一定之論推原其所以然皆由混禘于禘而皆以為合食于大祖也是則禘禘無辨矣而又欲勉強穿鑿分別其所以不同此所以紛紛多端而莫之一也知禘者禘其祖之所自出不兼羣廟之主而惟以其祖配之則禘與禘異不容混矣知大禘兼羣廟之主則自大祖而下毀廟未毀廟之主皆合食于大祖矣又何壇墀與郊宗世室之分如馬融之論

乎又何大王王季合食于后稷文武以下分昭穆各祭于文武二祧之室如鄭玄之論乎禘烝則功臣皆祭即司勳所謂祭于大烝是也誰謂禘祭功臣不與享如何休之論乎知禘禘之不同則鄭康成徐邈之說皆非矣其間相因不相因之說皆無謂矣又何同異得失之足論乎

長樂陳氏曰祭祀之禮有大有小有備有闕天子備而不闕然有所謂闕者大故之時而已諸侯闕而不

備然有所謂備者有不朝之歲而已周秋冬之祭與異代同而春夏之祭與異代不同禘祫與異代同而祫之時與異代不同蓋周之春夏謂之祠禴而異代之春夏謂之禘禘周之祫常在十月而異代之祫未必十月天子植禘諸侯禘植以其不合于物薄之時尊卑同也天子祫禘祫嘗祫烝諸侯嘗祫烝祫以其合于時之前後而尊卑異也天子祫禘諸侯禘一植一祫者蓋禘則辨昭穆辨昭穆禮也嘗烝則嘗進品

物而已嘗進品物仁也禮所以辨異故天子于禘之
歲禘而後禘諸侯于禘之歲則禘而已仁所以統同
故天子禘而皆嘗烝諸侯嘗烝而禘又禮書曰君子
以義處禮則祭不至于煩數以仁處禮則祭不至于
疏怠悽愴發于霜露之既降怵惕生于雨露之既濡
此所以有四時之享也殷禮春曰禘夏曰禘而五年
之禘為大禘詩頌長發大禘是也周禮春曰祠夏曰
禘而五年之禘不稱大禘詩頌雖禘太祖是也然四

時之享皆前期十日而齋戒前祭一日而省眡祭之日禮交動乎上樂交應乎下自再裸以至九獻其禮非一舉自致神以至送尸其樂非一次以一日而歷七廟則日固不足而强有力者亦莫善其事矣若日享一廟前祭視牲後祭又繹則彌月之間亦莫訖其事矣考之經傳蓋天子之禮春則犴祭夏秋冬則合享犴祭各于其廟合享同于大廟王制曰天子犴禘禘禘嘗禘烝諸侯禘犴一犴一禘一禘是天子春犴

而三時皆禘諸侯亦春禘而秋冬皆禘其異于天子者
禘一牲一禘而已禘一牲一禘而嘗烝皆禘是始年
再禘次年三禘也天子言牲禘諸侯言禘天子言
禘禘嘗禘烝諸侯言嘗禘烝禘此特變文而已非
有異也鄭氏孔氏之說皆無所據楚茨之詩始言以
往烝嘗終言神具醉止儀禮大夫三廟筮止丁亥之
一日而言薦歲事于皇祖禮記言嘗禘之禮所以仁
昭穆則會羣神于烝嘗而具醉者禘也合三廟于一

日而薦于皇祖者亦禘也嘗禘所以仁昭穆亦禘也

有三年之禘有時祭之禘時祭之禘小禘也三年之禘大禘也時祭有小禮有大禮小禮春也大禮夏秋冬也公羊傳大事者何大禘也則明時祭之禘為小禘矣禮記曰大嘗周禮曰大烝則明春祀為小禮矣蓋小禘止于未毀廟之主大禘則及于毀廟之主禮記曰周旅酬六尸又曰禘于大廟祝迎四廟之主夫天子旅酬止于六尸諸侯迎主止于四廟非小禘而

何

嚴陵方氏曰：禘，禘也。禘者以其無禘以配，故謂之禘也。禘者三年之間，祀禘嘗烝者四時之常祀，間祀之禮為大，常祀之禮為小。天子諸侯當禘之歲而禘，禘不禘者以品物之少不足以備大禮，故也。天子先間祀而後常祀，故曰禘。禘下言禘，禘嘗禘烝，諸侯先常祀而後間祀，故曰禘。禘下言嘗禘烝，禘蓋尊者先大卑者先小，故也。諸侯殺禮不禘，禘一禘一禘而

已至于四方各朝于一時而四時常祀又不能無闕
魯東方之諸侯也明堂位獨不言春祭者以此

馬氏曰禘者合也以人生前有會遇之歡而死則不
可無會遇之禮故合羣廟之主祭于大廟天子三時
祭皆有禘此虞殷之制也至于周則三年一禘五年
一禘一禘則在于五年之間禘禘之制說者辨其大
小先後不同有以為禘大于禘有以為禘大于禘蓋
古者三年一禘五年一禘而禘則先禘則知禘有大

于禘也故周官以肆灌獻享先王此禘也以饋食享先公此禘也以肆灌獻享先王則以飲為主以饋食享先公則以食為主

山陰陸氏曰據此時祭唯禘各于其廟祀之若夏禘秋嘗冬烝三昭三穆皆升合食于祖廟所謂三年一禘與此異彼禘之大者也公羊傳曰大事者何大禘也毀廟之主陳於太祖未毀廟之主皆升合食于太祖言大以有小故也穀梁傳曰大事者何大是

事也著禘嘗著猶別也以有此經禘嘗之嫌故也左傳曰特祭于主烝嘗禘于廟特所謂牲禘也諸侯闕一時祭下天子也毛詩傳曰諸侯夏禘則不禘秋禘則不嘗唯天子兼之據此諸侯三年一禘五年一禘又云時祭天子言牲禘言禘嘗禘烝諸侯言禘牲言嘗禘烝禘互文也相互而天子言禘牲在上亦言之法諸侯于禘一年牲一年禘下天子也凡有所合皆禘也士虞禮曰哀薦禘事何必三年然後為禘

李氏曰禘者諦定昭穆尊卑也禘合聚飲食也蓋禘之道在親親禘之道在尊尊尊尊故分而祀之親親故合而祀之夏道忠故大祭有禘而無禘殷人質故大祭有禘而無禘周則五年而兼用之

石林葉氏曰古者祔主于廟則合羣主而禘祭所謂饋食之禮自禘之歲推而至三年率以為常所謂三年之禘天子得天下之歡心以事其先王其物為備故先禘而後時祭諸侯得一國之歡心以事先君其

物不備于天子故先時祭而後禘唯其物備而先禘故三時得以徧行止牲禘而已唯其物不備而後禘故雖時祭禘亦必廢祭而止禘嘗禘烝而已此諸侯之制所以異于天子也

新安朱氏曰正義所解亦難曉禘祭以春物未成其禮稍輕須著逐廟各祭禘之類又却合為一處則牲反詳而禘反略矣又據正義禘禮是四處各序昭穆而大傳謂禮不王不禘王者禘其祖之所自出以

其祖配之若周人禘帝嚳配以后稷是也如此則說
禘又不可通矣又云春秋書禘于大廟用致夫人又
不知禘于大廟其禮如何大廟是周公之廟先儒有
謂魯亦立文王廟左氏載鄭祖厲王諸侯不敢祖天
子而當時越禮如此故公廟設于私家皆無理會處
又諸侯祔則不禘一段是歲朝天子廢一時祭春秋
朝會無節豈止一歲廢一時祭而已哉不然則或有
世子或大臣居守豈不可以攝事

三山林氏曰事有出于一時之陋見行之數千百載莫有悟其非者良可嘆也夫禘祫之說諸儒聚訟久矣論年之先後則鄭康成高堂隆謂先三而後二徐邈謂先二而後三辨祭之小大則鄭康成謂祫大于禘王肅謂禘大于祫賈逵劉歆謂一祭而二名禮無差降又或謂禘以夏不以春祫以冬不以秋矛盾相攻卒無定論此皆置而弗辨其可深責者始為私見陋說召諸儒之紛紛者其鄭氏之失歟鄭氏之說曰

魯禮三年喪畢而禘于太祖明年禘于羣廟自爾以
後五年而再殷祭一禘一禘周禮廢絕久矣鄭氏何
據而云為之說者曰周禮盡在魯鄭氏據春秋魯禮
則周禮可知矣僖公薨文公即位二年秋八月大事
于大廟大事禘也推此是喪畢禘于太祖也明年春
禘雖無正文約僖公定公八年皆有禘又可知蓋以
文公二年禘則知僖宣二年亦皆有禘僖宣二年既
有禘則明年是三年春禘四年五年六年秋禘是三

年禘更加七年八年并前為五年禘故禘于羣廟也
自後三年一禘五年一禘嗚呼鄭氏不知春秋固妄
為此說後學又不察故為所惑也當春秋時諸侯僭
亂無復禮制魯之祭祀皆妄舉也諸侯而郊上帝禘
始祖罪也大夫而旅泰山舞八佾罪也春秋常事不
書其書者皆悖禮亂常之事故書郊者九書禘者二
與夫大事一有事二烝二嘗一之類無非記其非祭
何反以為周禮而足法乎使魯之祭祀如周之禮則

春秋不書矣據僖公以三十二年冬十二月薨至文公二年秋八月喪制未畢未可以祫也而乃大事焉一惡也躋僖公二惡也彼有二惡春秋譏之鄭氏乃謂三年喪畢而祫于大祖者果禮邪又曰明年春禘經無三年禘祭之文何自知之徒約僖公宣公八年皆有禘而云愈繆也魯之設祭何常之有聖人于其常又不書之何得約他公之年以足文公而見三年之禘與五年而再殷祭乎使文公二年不因躋僖公

則春秋不書大事使僖公八年不因用致夫人則春秋不書禘不書又何準也況宣公八年經書有事于大廟則是常制也而以為禘何邪誠為禘祭經不得謂之有事且閔公二年春秋書吉禘于莊公是魯常以二年即禘矣何待三年與八年乎閔有禘文而不之據宣無禘文而妄據之傳會可見也不然魯之僖公始書三望豈他公皆可望乎至成公而後書用郊豈他公皆不郊乎桓公一歲而再烝十二公而為一

嘗又可以為法乎取亂世之典以為治世之制鄭氏
豈知春秋哉諸儒波蕩而從之歷代祀典咸所遵用
益可悲也夫其論禘祫之制既繆至其言祭之時亦
非矣春秋書大事于秋八月而彼以為冬書閔公之
禘于夏四月書僖公之禘于秋七月而彼一以為夏
既本魯禮以行祀典而又不用其時是自戾也雖然
魯禮誠非矣先王之制可得聞乎曰孟氏之時不聞
周禮之詳矣矧加秦火之酷乎夫子曰多聞闕疑鄭

氏惟不知闕疑之理乃妄說以惑世況又效其尤邪
求之聖經禘祫之文不詳所可知者禘尊而祫卑矣
禮不王不禘或問禘之說夫子荅以不知譏魯僭僭
也春秋之法所譏在祭則書其祭名不然則否書郊
書望書禘則所譏在郊望與禘也若文公之祫則譏
其短喪逆祀不在于祫故曰大事而已何者禘者以
始祖之廟未足以盡追遠尊先之義故推始祖所自
出之君而追祀之則謂之禘此天子祭名諸侯無禘

禮魯用之僭也若禘則毀廟未毀廟之主皆合食于大祖非惟天子有禘諸侯亦得禘也詳二祭之名則禘尊禘卑可謂明矣先儒據鄭氏說率以禘大於禘是以諸侯之制加天子之制可乎考之經籍禘禘之文可知者此耳至于年數之久遠祭時之先後則經無所據學者當闕其疑不得據漢儒臆論也之奇

新安王氏曰大禘大祭也禘三年一祭其禮次于大禘禘嘗烝時祭也王制所記蓋每遇三年當禘之

時春則為禘一祭而已不行禘祭故曰禘禘夏祭則先禘而後禘秋祭則先禘而後嘗冬祭則先禘而後烝故曰禘禘禘嘗禘烝言禘與禘並行于夏禘與嘗並行于秋禘與烝並行于冬非若春之禘禘也鄭曰魯禮三年喪畢禘於大廟明年春禘于羣廟是後五年而再殷祭一禘一禘魯之失禮春秋所譏不可為證也五年再殷祭之說自漢至今學者從之未有與鄭氏辨者三年喪畢禘于大祖明年春禘于羣廟亦

未有言其非者嘗試論之周之禘大祭也記曰禮不
王不禘嗣君即位新主入廟方有禘禮故大傳謂之
不王不禘周語謂之終王於是合羣廟之主與毀廟
之主與新主共為一祭以審諦昭穆祖之所自出者
正東鄉之坐大祖配之自大祖而下昭皆南鄉穆皆
北向既祭七世之祖其主藏于夾室新主入于禩宮
昭穆以次遞遷故謂之禘無五年再禘之禮也祫祭
行于三年毀廟未毀廟之主皆升合食于大祖比年

行之則為數數則煩數年不行則為疎疎則怠故以三年一禘為節周人喪祭之後有卒哭之祭以其主祔於祖父而曰哀薦禘事言初合食于祖廟也與三年之禘名同禮異三年喪畢而行吉祭後有大禘之禮大禘之後四時有祭而三年一禘不復再禘此不王不禘之說也然則先禘後禘其理曉然故禘以審昭穆為名禘以合食為名既禘則昭穆以定而不遷何再禘之有升祔之禘既非三年合食之禘乃曰先

禘後禘又失之矣

天子社稷皆大牢諸侯社稷皆少牢大夫士宗廟之祭
有田則祭無田則薦庶人春薦韭夏薦麥秋薦黍冬薦
稻韭以卵麥以魚黍以豚稻以鴈

鄭氏曰有田者既祭又薦新祭以首時薦以仲月士
薦牲用特豚大夫以上用羔所謂羔豚而祭百官皆
足詩曰四之日其蚤獻羔祭韭庶人無常牲取與新
物相宜而已

孔氏曰自此至踰廟一節論天子諸侯祭用牲牢及庶人所薦之物鄭註云有田既祭又薦新者以月令天子祭廟又有薦新又士喪禮有薦新如朔奠故知既祭又薦新也註云祭以首時薦以仲月者晏子春秋云天子以下至士皆祭以首時故明堂位云季夏六月以禘禮祀周公于大廟周六月是夏四月也又雜記云七月而禘獻子為之也譏其不用六月也魯王禮也則天子亦然大夫士無文從可知也此薦以

仲月謂大夫士也既以首月時祭故薦用仲月若天子諸侯禮尊物熟則薦之不限仲月故月令孟夏薦麥孟秋薦黍季秋薦稻是也儀禮有地之士用特牲今無地之士宜貶降不用成牲故用特豚也諸侯大夫有地祭者用少牢其無地薦者則用羔鄭言大夫以上則包天子皆用羔也然天子諸侯不皆用羔亦用餘牲故月令以珣嘗麥以犬嘗麻鄭又引禮器及豳風證薦用羔之義註云庶人取與物相宜者謂四

時之間有此牲穀兩物俱有故云相宜若牛宜稌羊宜黍之屬非謂氣味相宜也

賈氏曰羊豕曰少牢三牲具為大牢但非一牲即得牢稱若一牲則不得牢名故郊特牲與特牲皆不言

牢也

儀禮疏

長樂劉氏曰聖人于天下昆蟲草木之微亦必有道以保其生成而遂其性命也故莫大于祭祀莫重于食享莫急于口腹也而事為之制禮為之防制所以

節貴賤之欲防所以立上下之中欲節于上則處其
下者莫敢縱情以踰矩中建于下則居其上者得以
盡性而興仁此三王所以獨步于後世也是故夏殷
周之道天子宗廟社稷皆大牢諸侯宗廟社稷皆少
牢大夫士宗廟之祭有田則祭無田則薦隨時所有
其陸產不過韭麥黍稻其庶羞不過卵魚豚鴈此之
謂王者之制所以節生民之欲而立中和之防也違
之者有刑有恥風俗之所不容也故上不敢失其節

以偏下下不敢踰其矩以僭上取之者有其時用之者有其度而昆蟲草木得以遂其性矣

長樂陳氏曰天子社稷福被于天下故用大牢諸侯社稷福止于一國故用少牢諸侯社稷少牢宗廟則大牢者宗廟以仁社稷以義仁則極其隆故與天子同義則有所辨故亞于天子卯魚豚鴈以時之所宜論之則春宜豚冬宜鮮此則秋以豚夏以魚以物之相宜論之則羊宜黍豕宜稷鴈宜麥魚宜苽此則黍

以豚麥以魚何也蓋魚之于夏豚之于秋鴈之于冬
尤多而易得者也庶人之薦不過致其易得者而已
月令季秋薦稻者稻常穫于十月而天子以前此者
為貴故與庶人異 又禮書曰古者祭必卜日而薦
新不擇日祭有尸而薦無尸以至不出神主奠而不
祭有時物而無三牲黍稷此薦新之大略也鄭註釋
王制謂大夫士祭以首時然祭以致禮而有常月薦
以致孝而無常時周禮王者享烝之畋皆在仲月是

祭有常月也月令王者薦新或于五月或于仲季唯其時物而已是薦無常時也

嚴陵方氏曰牢者圜也以能有所畜故所畜之牲皆曰牢也大牢具牛羊豕焉以其大故曰太少牢則羊豕而已以其小故曰少天子之社稷主天下之土穀故用大牢以祭之諸侯之社稷主一國之土穀故用少牢以祭之此隆殺之別也薦以時物而已祭則備庶物焉備庶物則其禮為盛非有田者不足以供之

也大夫士而有無田者謂諸侯之大夫士而已大夫
無田且不祭而庶人得祭于寢者祭于寢其禮略而
易備故也且通而言之薦之于神亦可謂之祭也韭
之性溫則陽類也故以配卵卵陰物故也麥與黍皆
南方之穀亦陽類也故配以魚與豚魚與豚皆陰物
也稻為西方之穀則陰類也故配以鴈鴈陽物故也
植物之陽者配以動物之陰植物之陰者配以動物
之陽亦使陽不勝陰陰不勝陽而已

延平周氏曰諸侯宗廟用大牢社稷用少牢何也諸侯有君道有臣道有君道故宗廟之祭與天子同用大牢有臣道故社稷之祭少牢而已有田則祭無田則薦言牲殺器皿衣服不備不敢以祭也

馬氏曰天子諸侯社稷之神則一而其禮有大牢少牢之異所以辨上下之等也楊子曰天子制公侯伯子男以庸節節莫差於僭此天子與諸侯別一制度亦所以防僭亂之階祭禮詳薦新禮略惟士無田則

亦不祭與此同也

山陰陸氏曰楚語曰天子舉以大牢祀以會諸侯舉以特牛祀以大牢卿舉以少牢祀以特牛與此不同舉重者也六牲為會日三舉也天子舉以大牢亦以會也諸侯舉以特牛亦以大牢卿祀以特牛亦以少牢今其言如此非故為戾也詞有差次古之人立言多此類如曰不然士食魚炙不應不食肉庶人食菜不應不食魚天子嘗黍在夏故庶人秋始薦黍天子

嘗稻在秋故庶人冬始薦稻由是言之天子孟夏嘗
麥庶人薦麥在仲夏矣天子仲春薦韭庶人薦韭在
季春矣

李氏曰康成謂祭以首時則周官司馬中夏享禘中
冬享烝固非首時也謂薦以仲月則月令孟夏薦麥
季秋薦稻固非仲月也為康成之說者謂宗廟與天
地之祭不同則周官祭社祀禘與享禘享烝皆仲月
也噫亦視時物之有無歟故左氏曰始殺而嘗則仲

月也既蟄而烝則孟月也月令于孟秋薦黍季秋薦
稻也凡食天產以作陽德地產以作陰德古者事死
如事生故有卵魚豚鴈之天產韭黍麥稻之地產食
味之道也

廬陵胡氏曰天子至士皆祭以首時魯亦以孟月祭
其周禮四仲祭者因田獵而獻禽非正祭也大夫士
既以首時祭故仲月薦然服虔昭元年傳君祭孟月
臣仲月故司馬公祭儀亦用仲月從服氏也

祭天地之牛角繭栗宗廟之牛角握賓客之牛角尺諸
侯無故不殺牛大夫無故不殺羊士無故不殺犬豕庶
人無故不食珍庶羞不踰牲燕衣不踰祭服寢不踰廟
鄭氏曰握謂長不出膚故謂祭享羞不踰牲謂祭以
羊則不以牛肉為羞也

孔氏曰鄭註無故故謂祭享者案膳夫王日一舉鼎
十有二物謂大牢也是周公制禮天子日食大牢則
諸侯日食少牢大夫日食特牲士日食特豚至後世

衰亂玉藻云天子食日少牢朔月大牢諸侯食日特牲朔月少牢則知大夫食日特豚朔月特牲士食日無文朔月特豚故內則曰見子具視朔食註云天子大牢諸侯少牢大夫特豕士特豚是常食有限不得踰越故知謂祭享也謂諸侯祭以大牢得殺牛諸侯之大夫祭以少牢得殺羊天子大夫祭亦得殺牛其諸侯及大夫享食賓得用牛也故大行人掌客諸侯待賓皆用牛也公食大夫禮大夫食賓禮亦用牛也

故云謂祭享也祭以羊則不以牛為羞者案有司徹
少牢之祭云宰夫羞房中之羞注醢食糝食內則云
糝取牛羊豕之肉得用牛者祭既用少牢則糝亦不
用牛肉以羊肉為羞也

長樂陳氏曰大禮必簡則小禮必煩簡則內心而貴
誠故天地之牛角繭栗煩則外心而貴味故宗廟之
牛角握賓客之牛角尺角繭栗非必繭栗也以其過
于繭栗則非禮角握非必握也以其過于握則非禮

至于角尺亦若是也國語曰禘郊之牛角繭栗禘之牛與郊同者彼以禘為五帝之祭故也周官小司徒有飲食之禁令則諸侯無故不殺牛以至庶人無故不食珍者之禁令也聖人之道其極高極明者以之處已而不以處人其易守易行者以之處人而不以處己禹菲飲食而致孝乎鬼神惡衣服而致美乎黻冕卑宮室而盡力乎溝洫此其處己者也庶羞可以及牲而不踰牲燕衣可以及祭服而不踰祭服寢可

以及廟而不踰廟此其處人者也蓋人之所以侈心
惑性者常在于服食居處之間禮之所防存心養性
之術也

延平周氏曰祭天地宗廟及賓客用牛不同以純而
未散者為上

山陰陸氏曰言藟又言栗者言雖如栗亦可以著角
握角尺容有過之者矣楚語曰禘郊不過藟栗烝嘗
不過把握

橫渠張氏曰不踰不豐于牲也傳者以品之不踰非也牲體少而羞掩豆是之謂踰牲庶羞不踰牲謂多少不謂用羊而不用牛也

石林葉氏曰庶羞常薦而踰牲嫌于備物燕衣常用而踰祭服嫌于事神寢所常安而踰廟嫌于享親故禮皆不與也

禮記集說卷三十一


謹案第四頁前三行蓋康成以意揣之也刊本
康成訛成康今改

第二十頁後八行又何壇墀與郊宗世室之分刊
本世訛石今改

第二十一頁前二行各祭於文武二祧之室刊本
室訛分今改

第二十五頁前四行唯禘禘各于其廟祀之刊本
禘下行為字據義疏刪

第二十五頁後五行又云時祭刊本云訛去今改
第三十一頁前八行蓋每遇三年當禘之時刊本
每訛年今改



覆校官編修臣項家達
校對官檢討臣王坦修

謄錄監生臣王肯勵